

四庫全書

集部

欽定四庫全書

集部

二妙集卷一
三至

詳校官中書臣呂光復

助教臣常循覆勘

總校官中書臣朱鈐

校對官中書臣朱斡

謄錄監生臣蔣鳳牲

欽定四庫全書

集部八

二妙集

總集類

提要

臣等謹案二妙集八卷金段克已段成己兄弟詩集也克已字復之號遜菴成己字誠之號菊軒稷山人克已金末嘗舉進士入元不仕成己登正大間進士授宜陽主簿元初起為平陽府儒學提舉堅拒不赴兄弟並以節

終初克已成已均早以文章擅名金尚書趙秉文嘗目之曰二妙故其合編詩集即以為名泰定間克己之孫輔官吏部侍郎以示吳澄始序而傳之朱彞尊曝書亭書目于二妙集下乃題作段鏞段鐸撰考虞集所作段氏世德碑鏞鐸實克已成己之五世祖鐸官至防禦使未嘗有集行世彞尊蓋偶悞也集凡詩六卷樂府二卷大抵骨力堅勁意致蒼涼

值故都傾覆之餘悵懷今昔流露于不自知
吳澄序言其有感于興亡之會故陶之達杜
之豪其詩兼而有之所評良允房祺編河汾
諸老詩八卷皆金之遺民從元好問遊者克
已兄弟與焉而好問編中州集金源一代作
者畢備乃獨無二人之詩蓋好問編中州集
時爲金哀宗天興二年癸巳方遭逢離亂留
滯聊城自序稱據商衡百家詩畧及所記憶

者錄之必偶未得二人之作是以未載故又稱嗣有所得當以甲乙次第之非削而不錄也河汾諸老詩集所載尚有克己楸花詩一首成己蘇氏承顏堂等詩七首皆不在此集中疑當時所自刪削又此集成已冬夜無寐一首中秋二首雲中暮雨一首河汾諸老詩集皆題為克己作此集出自段氏家藏編次必無舛錯當屬房祺誤收今姑各仍其舊而

特識其同異於此馬乾隆四十二年十月恭

校上

總纂官

臣

紀昀

臣

陸錫熊

臣

孫士毅

總

校官

臣

陸費

墀

二妙集原序

中州遺老值元興金亡之會或身沒而名存或身隱而名顯其詩文傳於今者竊聞一二矣有如河東二段先生者則未之見也心廣而識超氣盛而才雄其蘊諸中者叅衆德之妙其發諸外者綜羣言之美夫豈徒從事於枝葉以為詩為文者之所能及哉於時干戈未息殺氣瀰漫賢者辟世苟得一罅隙地聊可娛生則怡然自適以畢餘齡幾若澹然與世相忘者然形之於言間亦

不能自禁若曰冤血流未盡白骨如山丘若曰四海疲
攻戰何當洗甲兵則陶之達杜之憂蓋兼有之其達也
天固無如人何其憂也人亦無如天何是以達之辭著
而憂之意微後之善觀者猶可於此而察其衷焉伯氏
諱克己字復之入稱遜庵先生在金以進士貢金亡餘
二十年而卒終身不仕仲氏諱成己字誠之人稱菊軒
先生在金登進士第主宜陽簿年過八袞至元間乃卒
雖被提舉學校官之命亦不復仕遜翁之孫輔由應奉

翰林敎歷臺閣今以天官侍郎知選舉解后於京師出
其家藏二妙集以示一覽如覩清節三復不置已而嘆
曰斯人也而丁斯時也斯時也而毓斯人也昔之耆彥
嘗評二翁謂復之磊落不凡誠之謹厚服化摹寫蓋得
其真予亦云然翰林學士資德大夫知制誥同修國史
臨川吳澂序

河東段氏世德碑銘

有序

泰定四年秋天官侍郎段輔出其先世遺文以示集讀而歎曰嗟夫昔宋失中原文獻墜地蓋為金者百數十年材名文藝之士相望乎其間至乎明道正誼之學則或鮮傳者矣及其亡也禍亂尤甚斯民之生存無幾況學者乎而河東段氏之學獨行乎捄死扶傷之際卓然一出於正不惑於神怪不畫於浮近有振俗立教之遺風焉嗚呼可謂善自托於不泯者矣於是輔告集曰維

段氏世居絳之稷山由輔而上遡其可知者為前宋司理參軍諱應規十一世矣司理之五世孫為金武威郡侯諱矩生三子長曰鈞次曰鏞又次曰鐸鐸以正隆二年進士官至華州防禦使武威所因以得封者也鏞先卒而二人以文行稱謂之河東二段在防禦時隴西李愈作武威墓表五世之內名德並著自武威而至於今又六世矣家學幸可徵焉子為叙而篆之將刻諸墓道集序在同朝不敢辭乃按而書之凡李愈氏已表者不

其所具者自鈞始鈞生汝舟汝舟生恒恒生克已成已
修已克已成已之幼也禮部尚書趙公秉文識之目之
曰二妙成已登正大進士第主宜陽簿及內附朝廷特
舉平陽提舉學校官不起而克已終隱於家一時諸侯
大夫士皆尊師之各有文集數十卷集所為讀而興歎
者也克已之子三人思永思誠河中府儒學教授思溫
皇子安西王召為記室參軍不赴以子輔貴贈中順大
夫禮部侍郎上騎都尉追封河東郡伯成已之子曰思

義平陽路儒學教授四子之孫凡十人以英甫彥孚輔之兄彛經循順其弟也其九人皆仕有祿位獨輔最顯以文行選應奉翰林三為御史編歷陝西江南及中臺以司業教國子生判太常禮儀院尋貳天官譽名日盛君子有望焉嗚呼自司理參軍至於今段氏十一傳凡二百有餘年而代亦三易矣文學之懿前後相屬豈不偉哉彼以功名富貴赫奕一時者何可勝數然而不過一傳再傳而聲跡俱泯自其子孫有不能知其世視此

孰為得失哉故為之銘銘曰氣蓋世兮慮徧物邈無托
兮久焉識眇若翰兮著微迹何千年兮如白日翩翩兮
第昆頤予庭兮鞠存嘉邈兮無悶善自託兮斯文皇肇
造兮有區羣材來兮竝驅匪伏兮有待視其家兮多書
爰惟嶽兮潤流斯河世寔顯兮子孫則多邦人有言兮
先生之家翰林直學士奉議大夫知制誥同修國史蜀
郡虞集撰并書

[illegible]

欽定四庫全書

二妙集卷一

金 段克已

段成已 撰

五言古詩

贈醫師范子和

并引 以下克已作

范君子和居姑射山麓世隱於醫敏給多藝能
畧涉獵文史一日會薦紳輩於其家酒半舉大
白而言曰不肖竊有志於斯文敢求數十字以

為珍藏意甚勤因為賦古風一篇告之以君子之道使知所操持焉非直使誇衒於世實篋笥而已

我廬姑射東君居西山隅相去不十里曳杖以問途知我遠方來盡室相煦濡衰年况多病藥物必爾須診視得家法就為醫扁盧貧賤人所惡勢利人所趨君子異于衆而獨與我娛延我升中堂坐列皆明儒酒餚既登俎左右羅童奴令行爵無筭促使開大壺酒酣意氣逸

高論到唐虞日晏未得歸欲起時見拘自言小邑中何
嘗接士夫久客惜人情褊量動輒踰仍呼兒出拜頭角
異凡雛從小好文字未覩明月珠長者幸有賜終身不
敢渝既蒙主人知所願獻良圖世人豈無才惟德不能
俱不見盆成括以是喪厥軀又徵荀氏語至察則無徒
大辨外若訥聰明守以愚顏子稱大賢尚云有若無吾
言儻无忽榮名不須沽

歲己酉春正月十有一日吾友張君漢臣下世家

貧不能葬鄉鄰辦喪事諸君皆有誄章且邀余
同賦每一忖思輒神情錯亂秉筆復罷今忽四
旬矣欲絕不言無以表其哀因作古意四篇雖
比興之不足觀者足知予志之所在則進知吾
漢臣也無疑

高樓浮薄雲知是何人宅賣諸輕薄兒身為五侯客日
暮鬪雞回車騎何翁赫鼻息吹虹蜺行路皆踧躅豈知
黔婁生儲粟無擔石衣衾不掩尸送我城東陌寥寥百

世下誰分夷與跖

北方有黃鵠飽義氣勇烈天寒辭故巢思欲近丹穴吁
嗟翅翎短雲海路隔絕鳳凰不相待孤憤無由洩恥與
鴟鵂羣朝夕肆饕餮一步兩呌號心摧口流血側頭向
蒼昊永與羈雌決人皆尚鴟鵂反謂黃鵠劣世無乘瓢
翁軒輊定誰說猿鶴與沙蟲泯泯同一轍悲來結中腸
欲辨且三咽

藝蘭當清秋生育胡不早西風發微香能得幾時好飛

霜半夜來滅沒先百草真宰獨何心吞聲不復道
驅車上太行中道車軸折停車卧轅下骨斷筋力折撫
膺呼蒼天淫淫涕如雪古往與今來此憾何時絕

同封仲堅采鷺鷥藤因而成詠錄寄家弟誠之兼

簡李衛二生

有藤名鷺鷥天生匪人育金花間銀蘂翠蔓自成簇褰
裳涉春溪采采漸盈掬藥物時所須非為事口腹牛溲
與馬渤良醫猶並蓄況此香色奇兩通鼻與目尤善療

瘡瘍先賢講之熟世俗不知愛棄置在空谷作詩與題
評使異凡草木

贈荅封仲堅

念昔始讀書志本期王佐時哉不我與觸事多軼軻歸
來濯塵纓羸裝聊解駝牛芹多奇峰流水出其左誓求
十畝田於此養慵惰種椒盈百區栽竹僅萬箇自謂得
所依心口默相賀經營久未成蘊櫝乏奇貨低徊不能
去借宅便高卧始構茆三間橈桷久摧挫暑雨畏霖潦

霜風苦掀簸，豈無富貴人。粟布救寒餓，恥隨肥馬塵。擁
鼻不敢唾，淹延歲月深。十手指庸悞，塵埋劍鋒缺。彈鋏
悲無奈，時當春之仲。桂魄月半破，丁丁聞啄門。有客來
相過，探懷出新作。高唱成寡和，清辭麗卿雲。齊梁那復
課，蹇余鞭不前。躑躅蟻旋磨，枯腸藜覓苦。奇字厭搜邏，
君子真可人。沽酒酌通播，酒酣膽氣麤。狂言驚四座，舊
遊渺何許。行路方坎坷，作詩寄問聲。別離傷老大，

壽冠興祖

飄飄關輔客逸氣薄雲霄承學有源委持論生風颿束
髮侍玉階香名滿天朝射策不一中雄文深自韜嘉邇
思居洛歌詩祇和陶生涯足文史蹤跡混漁樵蹭蹬三
十年壯志殊未彫人稱寇公後商鼎復能調才本時不
容坐使雙鬢焦竭來汾上水吾見秋蟲號西風下木葉
天氣正沈寥勸君一杯酒能令百憂消開懷且痛飲勿
令鄉關遙

寄張弟器之

愛酒陶彭澤映世清節耀乞食賦新詩不復事邊徼士
生多軼軻異代或同調東山不可作敢望蟠溪釣壺觴
聊自傾登高一舒嘯但恐汙世塵永為達人笑

山堂久岑寂宴坐度昏曉倚壁一蒲團幽人後計了日
高鼎茶鳴風細爐烟裊曳杖步庭除看雲頭屢矯安得
謫仙人神遊八極表

興上人駐錫姑射之麓他日邀余所居之靜樂齋
勉為賦此

我愛與上人閒處先著脚雖有買山錢難尋一丘壑向
來栖息地龍象久寂寞重尋林下徑竹石苦分薄溪水
恣交流巖花自開落却掃大室中一瓶還一鉢靜樂題
其顏塵緣聊解縛寥寥千載下此理誰發藥我今為拈
出永免一重錯有淨必有垢無苦亦無樂混沌元不死
七竅剛自鑿鄭重庵中人萬法本無著獨有太古心油
然滿寥廓

陳君百祿隱居河汾世以醫名家臨財廉取與義

性喜諧雖外若寬縱內實重慎而有常心真善
學醫者也辛丑之秋余店作君調護周至既獲
勿藥欲酬而不可姑以詩答其勤

我來汾沮洳汾濱君所居豈期牢落際有子可與娛遺
我以方藥投我以素書往來八九年問難更起余妙處
自心得論說乃其餘衆議逌持執辭語費百車君以一
言蔽如亂髮得梳丹砂與赤箭應用並貯儲困窮尤所
重視之骨肉如孰謂斯世中乃見古人且我不為世用

以道而卷舒子胡自隱晦而不干名譽聞君有令子萬
里有權輿于公多陰德預使高門閭請君事其語勿謂
吾計踈

吾兄同仲堅采鷺鷥藤於午芹之東溪因詠詩見
示前代詩人未嘗聞賦此者此花長於田野籬
落間人視之與草芥無異是詩一出好事者將
知所貴矣感嘆之餘敬次其韻有與我同志繼
而述之不亦懿乎

以下成已作

微雨洒郊垌百卉欣竝育幽花發溪側間錯金珠簇徐
看是驚藤香味濃可掬忍饑出新句大笑負此腹遺落
榛莽間采擷誰見蓄情知無俗姿安能悅衆目先生日
來往東溪路應熟一經題品餘名字耀巖谷遇合良有
時不才異山木

呂氏用靜齋

兩崖夾窈峨一水中委蛇是間有高人靜與山林期結
茅並溪石故迹司空遺因人愛其山佳處應自知心閑

境隨勝眼靜山增竒寥寥丈室中日用夫何為不書咄
咄字高詠休休詩無人書一編有興酒數卮便是一生
了安問著與邇依依中條雲夢想紫芝眉昨朝寄書至
謂我來何時急營買山錢已覺從君遲他年兩繩床分
忍西山饑

壽夢菴張信夫

一杯甕頭春持壽丹山客洗盞置客前共坐林下石酒
酣語益真道合意自適東風吹醉眼高興寄空碧人生

金方山集卷一
天地間迅若駒過隙胡為就羈縛惴惴從物役何如夢
室中一笑百憂釋棄置勿復道旅懷陶茲夕

蒲城董公余素不識其何如人也一日袖橫軸所
謂龍窩圖者同仲堅來過而以詩見謁余雅不
能文詩尤非所長者加之老病日久縱不避拙
惡亦安能為他人雕肝腎邪渠請益堅余重違
封意且念其勤姑因所見以叙之云爾

封生携客來謁我蓬蒿裏軒軒抗塵俗不知誰氏子所

生吾既賢伊人亦云喜探懷出新圖一語煩舉似蹇予
不能文三請意未已溪山有素期入眼盡其美層雲蔽
重淵萬木夾兩溪飛流瀉絕壑千丈垂幅紙餘霏散如
霧點滴亂紛委何物竅其傍相傳龍所止廟貌寄空山
何代為經始年深祭血乾亂久誰復祀威靈昔所聞對
面隔千里誠通感必應雖遠猶在邇巍巍窟宅尊安卧
久不起何當洗甲兵倒挽幽溪水

余懶日甚不作詩者二年矣間者二三子以歌詠

相樂請題於吾兄遯菴遂以歲月坐成晚命之
因事感懷成五章以自遣志之所之不知其言
之陋也覽者將有取焉

負暄頽簷下病骨喜新霽微風動天宇木葉隕虛砌緬
懷平生事奔走愧非計投身田野間心迹得少憇時榮
豈不慕省躬自當逝薇蕨滿春山猶可以終歲

罷書掩闥卧窓牖亂清樾風枝驚宿鳥扎扎畏顛越葉
聲走前庭誤聽雨未歇不知霜已重但覺寒切骨耿耿

不能寐起坐候明發試問夜如何虛簷轉殘月

晨起坐高齋烏啼幽寂破小兒具文墨信手供日課既
無寵辱驚又不至寒餓自量亦云幸到此能幾箇更欲
希世榮所望毋乃過蒲團正溫厚得穩且安坐

連蹇拙進宦艱難昧理生一事且不免況欲二者并忍
窮分所安不為世所縈床頭一卷書靜洗胃次平偶逢
會心人款款話中情瓶儲喜不空今年賴西成

青山如有情向人呈偃蹇我本山中人一出偶忘反崎

嶮半天下始覺居山穩力極勢有迴若不費推挽稅駕
長自茲千里豈云遠舉手謝山靈應笑歸來晚

誅雙峯興上人

堂堂雙峯師不受世塵汙禪坐三十年俯仰無愧處平
生大事畢欲留不可住適來水中漚水行漚復聚適去
火上烟烟散火如故徜徉天地間去來隨所遇我懷未
能忘正隨分別趣涕餘會貞心三嘆出門去

贈呼延長原

我來負犢巔投迹汾水濱亂餘寡俦侶所遇皆所親一行未易完忍更求其純矯矯呼延生棟宇接近鄰雖云符詛師頗異尋常人疾苦在力救貴賤情一均功成不責報第恐傷吾仁曠懷寓杯酒不計醕與醇一酌萬事畢肝胆平輪囷酒酣奮長袖滿坐生陽春人皆笑汝狂我獨愛汝真參苓吾所須收為藥籠珍吾聞先天術原委有本因後人罕知學莫復窺其津華陀起東漢扁鵲名西秦二君本儒者卒以醫自神願生繼高躅勉勉勿

因循

贈研師寄寄翁

有客抗城客不知何人斯自云來西秦著脚汾之湄放
浪三十年野鹿不受羈是身寄虛空歛若駒隙馳竄名
書研間聊寄吾寄為遊戲出三昧我豈甄陶師心成應
之手觚攬各異宜萬象且胚渾一一非人私妙凝天地
中不甌亦不坯探懷出蒼壁炯炯光陸離摩挲湛秋水
隨手生寒漪雖鑿混沌竅太璞猶未漓回首銅雀瓦千

載垢有遺坐令呂與張羞受牛後咄便當什襲藏奚必
古見竒待價不求售特易詩人詩卷餘兩牛腰得之猶
恐遲歸來飯甌空一字不救飢咀嚼誑枯腸似高還似
癡商財與蠟屐優劣孰等夷不如且置之安事屢解頤
翁聞為一笑此事非所知苟可適吾欲君詩不當辭

刁少府優善堂

取人戒不周取善貴不遺理能兼衆美何必勞縈為奈
何當途人好以智自私身勤事仍左終日徒紛披君侯

本將種磊落真男兒延英闕賓館下問質所疑優善題
其顏美意良可知永懷正子賢千古猶一岐休休好善
心一出忠厚資片善或可取不厭蓬茅卑人輕千里遙
願吐胃中奇投誠盡實理入耳無諛辭從容談笑間萬
事無不宜三年報政成齷齪何其遲潛令十萬家共煦
晴春曦退食自高堂何慮復何思

梁國祥靜樂堂

穰穰區中人役心名與利于身竟何有乾沒無少置叔

敬有耳孫瑩瑩與時異一官不肯覓閑居養高志築室
塵境中中有塵外意方其厭囂湫歸來得小憇床頭一
卷書靜洗紛華累苟能樂其樂寧復事吾事見客不吝
情有酒即成醉為問東華塵何如北窓睡清風吹我懷
萬事覺無味誰知方寸間自有清涼地

陳子正容安堂

陳子少英邁逸氣不可挫典型肖乃翁出語輒驚座行
止非所能造物任掀簸功名鷹在韝歲月蟻旋磨區區

一邑中十載供吏課結廬慕淵明志向有許大澹墨寫
形似終日相對坐一室足我容百念付慵惰青山出簷
楹流水出其左植花數十叢種竹千百箇事來若機張
事去如甌墮浩然方寸間不受一塵污豈無二仲賢閑
暇日相過有酒相獻酬有詩互賡和溪山入笑談珠玉
霏咳唾徜徉天地間一物莫非我醉來語益真卿去我
將卧主人正高枕山鳥莫啼破

送張世傑赴京兆幕府

雨雪方載塗霜風裂膚肌丈夫四方志遊子千里期簡
書豈不畏嬾親髮如絲恩義兩相奪欲行還遲遲世榮
豈不慕此心難遽夷大分既有定僂俛安得辭伊人遇
知己第恐負所知去去勿重陳搏扶良自茲苟能以義
養猶足慰親思

馮生成之自燕歸平陽賴寂照先生獲脫奴役復
齒士列將復歸燕主吾友濟夫來謁詩姑序其
槩以答云

英英大為君雅志在千里坎窞不得前向姑止于此出處雖兩途動靜無二理燕坐三十年初不離朝市了了方寸間湛然若秋水馮生適何來眉目差可喜自云衣冠後家破偶不死失身坑阱中搖尾凡幾襁過者日千百藐焉不一止忽逢盤谷翁引手惟力致力極勢未回既出幾復委不知何因緣又入先生耳一見不忍遺即命加冠履奴虜豈所安推已乃知彼惻然動于中棄金猶棄糲少屬豺虎場永謝泥與滓乞詩答盛德此意良

亦美顧我欲何言一笑不如已先生世外人于汝初何
疾苟能肩一心綺語奚足恃屈信固有時此政在知已
勿如越石父以是驕晏子

崧陽歸隱圖

落落出世入視世猶糠粃獨惟愛山緣一念未渠已嘗
行崧陽道經觀畧可紀有山皆孱頑有水盡清泚寒籐
絡古木奇花間芳枳風從四山下紅綠亂紛委雲日互
蔽虧百態呈怪詭微泉不知處叢菁鳴宮徵山鳥忽驚

飛落花空岩裏靜聞雞犬聲人家應在邇百年能幾日
山間有餘晷孰知桃花源不出武陵水回首視人間囂
囂足塵滓便擬結緣茆匆匆迫行李一來汾沮洳留滯
綿幾祀幽懷眇難忘淡墨寄形似舊遊一經眼來往差
可喜此心本無著天豈為物使昔何從而來今從何而
止翛然來往間于是得之子幻影竟安用我亦聊爾耳
一笑兩忘言庭花萎堦祀

二妙集卷一

欽定四庫全書

二妙集卷二

金 段克已

段成已 撰

七言古詩

丁酉春雪

以下克已作

幾日東風吹凍雪麥苗乾死埋沙塵客床欹枕睡不穩
寒氣偏尋老病身沉沉夜色涵窻白却訝微雲弄山月
開門淡蕩雪滿空拂面猶疑柳花濕二氣交感天地通

千林玉立天經風蓬萊宮闕墮人世三日不見車馬蹤
霹靂變變殊未已此瑞應知同萬里遠客休歌蜀道難
農夫剩有豐年喜買牛便好事春耕况復新來官長清
田家衣食無美惡不困追胥死亦樂

送李山人之燕

并序

李生湛然年四十未嘗從事於人偃蹇不與時
人偶每遇杯酒間輒擊節悲歌感慨泣下不知
者以為狂生愈益放曠不羈又好為奇詭大言

以驚動流俗人亦不知許也戊申歲春踵門告
予曰男兒生不成名死無以掩諸幽愚不佞誠
不能與草木同腐竊有志於四方先生許我乎
余乃為書告常所往來者會飲於芹溪之上壺
酒既傾客有執卮而前者曰方今戎馬盈郊熊
羆虓虎之士撫鳴劍而抵掌投壺雅歌未聞其
人子以儒自鳴執古之道求合於今之世憂憂
乎難哉顧子之囊無十金之資出無代步之乘

無名公鉅卿為主乎其內無相生相死之友奔
走於其外上不能激濁揚清以釣聲名下不乘
機抵巇以取一時之利奚恃而往其果有合哉
余應之曰不然夫適用之謂才堪事之謂力君
子之論人嘗觀其才力何如耳不當以勢利言
也儒者事業非常人所能知要不過適用堪事
而已議者至謂不能取舍於當世豈不厚誣哉
抑不知褒衣博帶者為儒乎規行矩步者為儒

乎以是而名其儒豈真儒者耶昔者百里奚自
鬻於秦管仲束縛於魯甯戚叩角而悲歌馮驩
彈鋏而長嘆叔孫通舍枹鼓具綿蕞之儀陸賈
脫兜鍪進詩書之說使數子者高卧於林丘累
微而不起尚何名譽之可期屈辱之可免哉今
之諸侯賓位尚有缺然不滿之處肯使至寶橫
棄路側狼藉而不收苟有好義強仁皆將善其
價而沽之况幽燕之地士尚意氣重然諾習與

性成者即生之此行余知其必有合也於是乎
咸賦詩以為贈余於交遊中最長特為序以冠
其首

與君把臂臨黃河缺壺聲裏度悲歌
玉缸酒半離筵起
千里東風射馬耳孰能忍飢學夷齊
看人鼻孔吹虹霓
莫道書生成事小
男兒蓋棺事乃了
劒心雄壯未能伸
客舍蕭條逢暮春
盧溝河上千株柳
滿地楊花愁殺人
贈劉潤之

平生不願萬戶侯但願一識劉荊州荊州已遠不可見
裔孫今幸從吾遊慨然議論吐肝胆腰間古劍鳴蛟虬
酒酣醉墨出險怪筆勢懍懍恍令人愁世人爭欲得一諾
黃金不用如山丘結交以義不以利樂人之樂憂其憂
自從管鮑死此道今悠悠豈意流落中忽見古人儔古
來賢哲士不達飢寒不解為身謀紛紛眼底知音少幾
向西風嘆白頭

遊青陽峽

東山氣象大，猛悍萬馬駸。駸來楚甸中，分不肯割鴻溝。
鍛礪戈矛期一戰，西山折北如西漢。獨餘絳灌奔而殿，
誰為劉項決雌雄。賴有韓彭力相援，盧溝直下兩山合。
泯泯暗流通一線，突為瀑布出山口。流沫成輪浪成淀，
前逾百步落石甕。黛蓄膏渟那敢眄，沈沈南去若白虹。
為嶼為泚互隱現，鑿開混沌幾千秋。世俗雖見如不見，
今人誰有筆如椽。為寫注名傳寓縣，人間佳節重清明。
呼兒折簡招諸彦，一生能著幾兩屐。佳處每欲經行遍，

山靈著意勸人遊吞吐烟霞生萬變山阿玉女跪焚香
岩畔仙人一笑倩居者儼若帝王尊劒佩雍容侍宮殿
植者磊落如鉅人聚立廣庭議封禪挾者矯矯如勇夫
執戈夾圮著綦弁平灘淺瀨乍可揭溪路曲折隨峯轉
葛屨偏宜苔蘚滑行襟時被薔薇罨當面烟嵐舞翠蛟
出岫閑雲飄素練羣行不復爭拘檻眼正明時脚還倦
班荆共坐溪上石拒妝濁醪具時饌良辰無奈夕陽催
羽觴正要清歌薦醒心况復有寒泉玉池遍返成三噉

三分春色二分休風外飛花時一片古人行樂欲及時
半百之年猶掣電一窮到骨不自治虛負胸中書萬卷
漫向山林老却人生來不識荊州面肝胆搓牙須酒澆
顧我非狂亦非狷紛紛世無真是非棄置從渠若秋扇
歸來新月偃林梢寂寞衡門掩深院

戊申四月遊禹門有感

黃河一線天上來兩山突兀屏風開天生聖人為萬世
驚濤拍岸鳴春雷冷雲直上三千丈石巔古廟高崔巍

斷碑歲月不可考丹書剝落空莓苔吁嗟去古蓋已遠
荒辭漫汗相驚猜安居平土果誰力愚民耳目誠可哀
一聲漁笛起何處滄洲雅興還悠哉

正月十六日夜雪

正月望夜夜氣交長空月輝生白毫東風淡蕩振林木
春雲滃鬱翻驚濤望中已覺沒河漢坐中不見羣山高
打窓雪片大如手蒼髯驚痒磔蝟毛我意天心厭誅戮
淨洗戰血除腥臊方今廊廟已備具左有夔龍右有咎

愛民親賢急先務朱輪皂蓋馳英豪遺黎幸脫瘡痍厄
謳吟聖世心堅牢驅牛負耒過門戶至死不復遠遁逃
白頭老儒最無用天生魯鈍非時髦日月消磨兩蓬鬢
天地飄零一緼袍詩書自足教稚子藜藿猶能飫老饕
清晨喜看蔬圃潤而可暫息抱甕勞蘭芽含甲未出土
蕭艾覆瓿已可藉閑中事業淡無味佳趣繞如食蟹螯
興來歌詠適情性背癢似得麻姑搔芹山崗岑寒石瘦
芹水澄澈春蒲桃直綠水山久留戀日向溪頭醉濁醪

青雲富貴豈不願蟠木輪囷寧自韜結構大厦要梁棟
操割清廟須騫刀功名倘可跂契稷跳梁里巷誇兒曹
君不見昔在周王師呂望快若逢尹寧烏號大人虎變
固莫測運命由來有所遭蓬萊方丈在何處我將入海
恣遊遨大風飄飄鯨背穩下視塵世空嘈嘈

送尋正道歸蒲中

以下成巳作

江頭楊柳才堪折陌上行人還又別春光不解苦留人
兩岸楊花飛白雪江風搖搖吹綠波欲別未別傷如何

勸君且住聽我歌後日重來白髮多

楊生深甫以醫鳴河汾遯菴先生以下皆贈以詩
生吾黨士也觀其意似不以淺近自期者故予
之所述不特稱道而已也

楊生頭角非凡子少以醫名動州里胸懷了了中可人
容貌恂恂外如鄙前徽未艾足憑藉論議滔滔有原委
人身造化一天地敢謂精微盡於此中情翫翫不自安
願就先知問其旨遯菴先生天下士挈携俶維為指似

古人桃源不難到但恐中心復中止千金再拜一言重
採掇方書究終始姓名會看滿人間滾滾西馳若汾水

松溪幽隱圖

何宮遺構山之隅長松蔽映千萬株中有一逕穿縈紆
冷風蕭瑟無時無人間赤日如洪爐恍如仙境來蓬壺
踪跡一墮聲利區回首自覺泥途污歲月因循歸計迂
松溪想像勞形模可憐塵夢今始蘇空對溪山慚畫圖
一日歸來聊自娛

壽賈總管

紫髯茁頤胆滿軀胸懷落落真丈夫古稱山西出將種
我公家世皆吾儒朝家未錄勲臣後時時射虎西山隅
一官平水今幾年鄉閭自覺疲氓蘇驥奎千里會須展
小邦未足勞馳驅繡衣錦帽不復見人言憇也終平吳
此時此日生鵷雛鬱蔥佳氣充公閭當筵擊筑聲嗚嗚
滿堂賓客聯簪裾天公催花為噓枯要及花下傾金壺
春風花開人不孤年年人與春風俱

送賈德遠北上

并序

生親老家貧輟晨昏定省之養以入京師其心
將有得而歸為親榮也雖其親之心亦然而一
生之勞故不暇計忘勞以悅乎親生之志也若生
者其以義養者與于其行乞言以為別吾老矣
言不見用於世雖無吾言顧於生何缺生意堅
而無倦色姑序其事以慰其行云

賈生歷落非庸子坐守窮廬足文史山田磽确無百畝

日課諸郎力耘耔瓶儲顛倒得幾何晨夕安能具甘旨
抱闕擊柝有不擇知效一官聊爾耳霜風栗冽歲云暮
水宿山行二千里及親而仕古所樂敢以崎嶇憚行李
明年花發聽君還綵戲階庭為親喜

二妙集卷二

欽定四庫全書

二妙集卷三

金 段克已

段成已 撰

五言律詩

方平道中

以下克已作

沙軟新經雨風輕不起塵
溪山隨處好花柳著行新
放浪聊終日蹉跎又一春
行年已如此猶復向來人

病怯春衫薄衰憐葛屨輕
平蕪迷舊迹幽鳥變新聲
興

與雲俱遠心同水共清
膠膠還擾擾回首笑浮生

微雨後偶成

孤憤憑誰訴長歌聊自怡
整衣憐瘦減扶杖覺衰遲
小飲非愁敵輕寒與睡宜
今朝春雨好稚子莫啼飢

寂寂春歸後悠悠夢覺時
病添花懊惱愁耐酒禁持
瓶貯無多粟囊封有許詩
倚床獨成笑此意豈人知

余僑居龍門山十有餘年
封張二子日從余遊而
貧又甚焉因寫所懷兼簡二子共成一笑

病久慵增劇途窮事轉迂木兼形共槁錐與地俱無醉
語勞揮塵悲歌漫叩壺鮮鮮籬下菊笑汝益羈孤

仲堅見和復用韻以答

道在山林勝心閑歲月迂家風貧更好習氣老難無目
力分詩卷生資負酒壺儒冠三十載轉覺此身孤

賦就慚辭拙書成共笑迂學傳三世舊用處一分無衰
髮頻看鏡流年付挈壺悠悠身外事目斷塞雲孤

避事嘗辭劇為儒不厭迂能貧從古少好學似君無行

李書填案生涯藥滿壺緹紫真孝子猶足慰孤
一飽不易得身謀方信迂家徒四壁立囊至一錢無但
喜心如水那憂腹似壺我窮君更甚此德未全孤

枕上再賡前韻

幾年成懶散一榻了慵迂詩酒心猶在功名夢亦無雨
來催覓句鳥去勸提壺靜裏那須此應憐客意孤

野步仍用韻示封張二子

散策溪頭路溪回路更迂山隨行處好人似往年無波

靜魚千里天晴春一壺龍門何限景歲晚不相孤
信步不知晚歸途那計迂一歡閑裏足萬籟靜中無藉
草便成席酌泉聊代壺娟娟林外樹江月伴人孤

李山人湛然始生之朝座客各賦詩為壽亦作四
韻以期所未至不特稱道而已庶幾盡朋友相
成之義云

脫迹豺狼外容身鷺雁間虛舟元不繫倦翼自知還飲
水猶能樂編茆足可跽莫教方寸地空負一生閑

封仲堅挽詞

但怪經過少，那知生死分。
總惟徒見像，尊酒罷論文。
楸人爲具丘墳誌，共聞世無韓吏部。
爲爾惜盧殷。

窀穸無時旦，行年甫過先。
歸心終莫遂，遺恨竟空填。
伯

道名雖著中郎業，不傳素書功未卒。
誰爲理殘編

君嘗集素

書等未竟而逝，好事分去皆寶藏之。

賣藥安垂老，看書祇自資。
依依姑射恨，渺渺奉先思。
誰恤蕭存後，徒昌東野詩。
孤魂招不得，獨坐涕垂頤。

蕭散青牛客

君嘗乘青牛以竹筒貯藥
腰間瘵疾無不愈者故云

伊余有素期詩

成先取示酒熟顧令知夜被嘗同覆朝筇復共搢豈期
行樂地回首搃成悲

誰謂如膠漆中年永別離崩摧五內熱契濶一生悲對
月聽歌處圍爐把酒時淒然獨不見何以慰相思

張器之雄飛亭

落魄張公子身貧志不凋鸞棲辭枳棘鵬翼上扶搖季
子終懷印相如竟過橋香名膾人口詩句大牛腰

贈答詩社諸君

以下成巳作

賣藥韓康伯能詩張志和真鋼須百煉明鏡要重磨眼
底如君少閑中得子多兵連猶未解莫厭數相過

漫成二首

一榻了窮冬吾生喜易供儘教人笑拙最苦客妨慵無
寐閑歌枕忘言醉倚筇可憐猿與鶴歲晚肯相從
時序驚何速形骸強自持整冠毛屢脫束帶孔頻移躡
蹬成空老吟哦不救飢百年行已久一笑欲何之

和答木菴英粹中

四海疲攻戰餘生寄寂寥
花殘從雨打蓬轉任風飄
有興歌長野無言立短橋
敝廬獨在眼殊覺路途遙

送王子壽之平遙

卜築謀南邁回轅遽北之
有情慚見厚無語只空悲
易忍行時淚難堪別後思
明年鴈來日屈指數歸期
宿靄添行色晨鐘戒促裝
去期何太迫引語不成章
戲彩憐文度扶衰賴孟光
臨汾一卮酒目斷隴雲長

識面時何晚論心分已深相期同卜築豈料遽分襟別
日宜加飲因風莫吝音家山有成約聞健早來尋

壽李濟夫

夫子何為者昂藏不入時眼前諸事罷膝下兩兒嬉落
落真難合悠悠聽所之黃花一杯酒歲喜與君持

二妙集卷三

欽定四庫全書

集部

二妙集卷四

五

詳校官中書

臣

呂光復

助教

臣

常循覆勘

總校官中書

臣

朱鈐

校對官中書

臣

朱炘

謄錄監生

臣

蔣鳳銓

謄錄貢生

臣

李學瞻

欽定四庫全書

二妙集卷四

金

段克己

段成己 撰

七言律詩

壽家弟誠之

以下克己作

道行不得且栖遲
一唯誰傳魯仲尼
瑞世不求麟鳳質
急難空賦鵲鷦詩
玉堂金馬知何處
白石清泉有素期
但使平生忠義在
樂天知命復奚疑

乙未人日飲范君子和齋酒酣賦詩呈座上諸君
正月七日春欲動拂面東風力尚微且貪席上賓朋樂
未覺平生事業非青山綠水俱可隱白髮蒼頭胡不歸
會須高挹浮丘袂千仞崗頭一振衣

五月二十三日夜分雨作涼風颯然木葉蕭瑟絕
似往年七八月感時物之變不能為懷漫浪成
詩聊以自釋

雲壓虛簷黯不收雨聲飛落碧山頭簾幃清徹三更夢

枕簟涼生五月秋，入夜悲風何浙瀝。
先時病葉已颼颼，心非木石能無感。
喚起悠悠故國愁。

寄仲堅漢臣二子

經春日日卧空廬，門巷蕭條長者車。
一卷時看王湛易，數行慵寄子公書。
風光少得如人意，顏面從教與世疎。
聞健不來花下醉，明年花發定何如。

詠雙峰興上人

試圖石上再生身，嘯月吟風性益真。
解脫蓮花祛夢幻。

金匱先生集卷四
忽驚野馬逐埃塵雙峯莫遂幽棲志一鉢誰為嫡嗣人
便恐叢林無正脉為君一哭涕橫陳

和家弟誠之詩社燕之作

膠膠世事久經諳肯著紅塵換翠嵐騏驎捕鷃非所任
干將補履豈其堪老無成事惟多懶少不如人何更貪
花下一杯誰伴我清風明月便為三

欲歸誰不遣君歸却恨歸來事違烽火未休家信少
山川良是故人稀黃金入手還能散白雪盈頭不肯飛

試問春愁都幾許長江滾滾日暉暉

人皆笑我我忘機我愛青山真得歸肯學班超謀肉食
更憐京兆泣牛衣心非理義焉能悅道勝紛華是故肥
獨坐鉤簾心語口回頭四十五年非

紅梅用誠之弟韻

梅花香裏倚蒲團萬事人間撻不干醉夢每憐春意淺
詩魂長遶夜枝寒記曾上苑溪邊見又向前村雪裏看
回首青鞋已如豆齒牙衰朽怯微酸

小梅初破月團團
戲蝶遊蜂未敢干
醉臉不禁經宿雨
芳心似欲訴朝寒
乍驚別後容華換
更與尊前仔細看
便好栽培近東閣
免教風味一生酸

癸卯春二月有五日
衛生囊之誕日也
座中生捧卮酒
乞言因用景純壽日詩韻以答盛意兼謝不敏

壓倒詩人白與元
淋漓醉墨出佳篇
心澄寒玉泉中水
衣惹霜岩頂上烟
歲晚相依清士瘦
窮途漸覺麴生賢

黃冠野服從人笑自斷此生休問天

自訟

無將大車塵冥冥無邇宵人惡易形吏部有書慚薦李
萊公躬軸謬推丁慎文已昧書中戒悔過聊書座右銘
自是昌陽堪引壽不須辛苦進猪苓

彥衡喪子鄉社諸君皆有詩以慰其哀余忝交游
之長烏能無言因賦此以贈之

昔年曾讀樂天詩晚歲情鍾玉雪兒今日為君重感嘆

片時何意便乖離迎門猶記牽衣笑撫榻空懷漲乳悲
夢裏不知生死隔舊嬉遊處細尋推

丁未新正與詩社諸公園亭宴集彥衡有詩衆皆
屬和一時搏酒賓席之勝殆可樂也余雖老顧
不可虛盛意勉為賦此

秋去冬來春又催昆明信有劫餘灰心遊碧落絲千尺
夢遶瓊林日幾回處世祇宜同鹿豕和羹誰復憶鹽梅
老來筆力猶強健一首新詩酒一杯

馮弟自北山來出其舊所為詩三百餘篇雖未暇
盡讀嘗鼎一臠足知餘味吾弟離羣索居無師
友之益能自道其所志蓋絕無而僅有者也雖
然掘井九仞而不及泉猶為棄井耳適漢臣張
君見過論文話舊以及吾弟之賢因作詩許其
所已能而勉其所未至以寄之幸時復觀覽以
自警省勿徒實篋笥而已

少年事業莫蹉跎聽我尊前一曲歌鑄劍必期經百煉

為文固自要三多凡胎須得丹砂換壯志休辭鐵硯磨
平地為山由一簣詞源他日看銀河

讀張志和傳

一葉輕舟一釣綸朝廷無處覓玄真太虛明月為知己
細雨斜風不著人西塞貪看飛白鷺東華忘却軟紅塵
還思擾擾求名者肯信人間有逸民

排遣

四海干戈戰血腥頭顱留在更須名病尋藥物為閑計

悶引文書作睡程萬事轉頭慵掛眼一杯到手最關情
此身定向山間老我與山英有舊盟

雄飛亭主人張君器之有龍庭之行賦詩為餞

千丈虹霓卷壯圖幾回彈鋏嘆無魚南溟久滯垂天翼
北闕誰飛薦鶚書投筆尚希班定遠題橋終遂馬相如
浩歌若過燕山市為我登臺弔望諸

蘭文晚節軒

晚節誰能識此君一官不復任浮沉蟄龍未起三冬卧

老驥猶存萬里心
陶令不來尊有酒
嵇康已逝室無琴
橫溪文字光千古
舊有新詩播士林

壽縣大夫薛寶臣

薛姓婣媽自古分
君侯苗裔萃其門
已聞佳績多前古
更溢餘波及後昆
久屈祥鸞栖惡枳
稔推利器過蟠根
徵書未至身閑暇
且看尊前舞袖翻

蕭少府挽詞

并引

以下成已作

隰倅蕭君余不識
其何如人也
余初入城府謁

余於客邸敝衣敗絮渺然一寒生爾爾後時時
於朋游中見之貌益恭氣益和與之言確然有
守而不踰乎中其加於人豈一等也一日卒於
平陽之學舍府僚張侯而下皆有挽章吾友公
度邀余同賦義不可辭且蕭君母氏在堂臨年
而失賢子行道之人聞之為之出涕以相其哀
焉况平昔常所往來者為出一章以弔但辭鄙
義拙不足以發明蕭君之德業例奉總帷以瀆

為媿

蘭杜摧芳不待秋，令人洒淚怨靈修。
門前弔客多青眼，堂上孀親半白頭。
共說才華為衆許，豈期仁義是身讎。
一坏冥寞重泉土，野老相傳說故侯。

搃管李侯移鎮京兆某久不能即門屏奉卮酒以
賀為慊謹作拙惡以餞行軒

一札飛書下日邊，龍移方伯鎮長安。
晉城父老心皆泣，秦地奸豪胆已寒。
千里馳驅容驥展，九霄空濶看鵬搏。

十年潦倒登門客，卧病無由挽去鞍。

和師巖卿遷居之韻

君看行路古來難，人鳥其間得少安。
三窟未成那用狡，一枝粗穩不須寬。
破除夢境原無國，收拾詩盟舊有壇。
秋菊春蘭俱可喜，等閒乘興一憑欄。

伯和告別北邁，欲得一言以資行橐。惓惓之意，蓋不能違也。病卧中殊無好懷，漫以此贈。

聽唱離歌一再行，翩翩裘馬戒晨征。
據鞍耿耿壯夫志，

金方里公集 卷四
去國遲遲遊子情野店人稀休奠枕山蹊路險莫貪程
一鞭行色西風順萬里秋空片鷁橫

李公子誕日賦詩為壽

歲晚喬松益倔強幾經風雪幾經霜鬢毛不與秋同老
名字長隨菊共香塔下芝蘭相照映人間岐路極微茫
願君參取東坡法有病安心是藥方

張提舉子華報政中臺賦詩為餞第荒淺良愧也
廟堂遣使出分巡撫養遺黎尚舊人今日不虛前日舉

去時仍是到時貧一心耿耿公家務兩鬢蕭蕭驛路塵
鞭筭自君家世事蹄涔未足到天鱗

送婁郎中秀實北上

氣壓元龍百尺樓搏空鵬鷃政高秋珥貂自屬封侯相
借箸咸推決勝籌會計不勞談笑了功名未肯等閑休
并州豪俠流風在慚愧儒冠謾白頭

壽李濟夫

往來詩酒晉城間白首相看尚昔年鳩卜一枝如我拙

卷四
驥思千里屈君賢床頭文史猶堪樂眼底芝蘭正可憐
但願太平身健在西風長醉菊花前

送總管李侯北上

姓名合上郭公臺落落襟懷間世才飛騎屢朝天上去
好音時向日邊來中心都為明時盡東閣當因好客開
萬里鵬程從此始垂天雲翼看徘徊

辛丑清明後三日詩社諸君燕集於封仲堅別墅
談笑竟日賓主樂甚然以未得吾兄弟數語為

不足既而遊庵兄有詩余獨未也主人責負不
已因賦以應命云

燕子歸來人未歸平生事業與心違天翻地覆春仍好
雨打風吹花又稀淡抹平林烟冉冉亂飄香雪絮霏霏
可憐光景誠虛擲坐對虛尊到夕暉

善惡人情已飽諳岸紗宴坐看晴嵐折腰不是淵明懶
作吏原非叔夜堪老去一觴猶有味病來萬事更何貪
從頭悉讀行年記慚愧春風四十三

題張氏雄飛亭

大署佳名揭棟甍相君英氣見平生
心隨燕雁共千里志效齊禽眇一鳴
昭代誰人飛鶚表滄溟何日徙鵬程
會乘風便扶搖上但恐垂天翼未成

紅梅

誰點冰梢絳雪團黃昏和月倚闌干
羞隨桃李爭春意要伴松筠傲歲寒
冷艷只宜閒處著淺粧難入俗人看
天心固惜和羹便空抱枝頭一點酸

淡掃胭脂碎玉團天生異物著江干月邊標格嬌增韻
雪底精神巧耐寒春意祇應容易見人情還作等閑看
可憐棄置蓬蒿外倚仗東風鼻一酸

送仲堅漢臣二子過南澗歸賦是詩

螻蟻微生脫怒濤一茆容膝儘逍遙宦情更比詩情薄
目力聊憑酒力消心類候虫寒更切髮隨霜葉病先凋
兒童失笑翁慵甚送客今朝却過橋

寒食後有感而作

二月山城尚薄寒冬衣未解嘆衰殘賞心更比年時減
酒量全非舊日寬點點花隨春共老悠悠詩興夢俱闌
此身只合山間了勲業何勞鏡裏看

薄命書生不足論春來憔悴寄荒村花間也作南華夢
眼底還無北海尊風掠平波寒翦翦雲拖殘雨晝昏昏
興來偶逐歸禽返燈火人家半掩門

送史生仲恭北上

裘馬翩翩事遠遊少年豪舉氣橫秋愛君早有四方志

為我能無一日留擊筑悲歌增感慨倒瓶濁酒浣離愁
他時相憶勞回首何處風沙認晉州

仲堅將去平水戒行之夕飲於史氏之山齋

得子膠膠擾擾間往來未熟各衰顏百年更有幾回醉
一月都無數日閑不放肝腸中白墮將何面目對青山
相逢且盡今朝樂明日紅塵復市寰

齋居偶成二首

赤子誰能捋虎鬚溪山好處颺輕裾頭顱久覺非侯相

顏面從教與世疎一榻清風塵土外半軒黃菊雪霜餘
明經自為兒孫計敢與鴻儒論石渠

湛如古井冷無波鈍若吳鉤溢未磨半紙功名蝸左角
百年身世蟻南柯天翻地覆親曾見暮四朝三多幾何
萬事轉頭供一笑向來事業儘蹉跎

冬夜無寐書以自適

四壁催顏手重泥一枝隨意即成栖歸來已化千年鶴
老去慵聽半夜雞世事榮枯都是幻物情長短不須齊

寸心耿耿何人會隱見西窓月色低

用韻答封張二子三首

有介誰斲鼻端泥借榻聊從地主栖萬事成虧均野馬
半生癡點等醯雞文章自笑非時樣道德空期與古齊
老懶正疑閒處著高名無用不如低

心如墮絮已沾泥身似驚禽未得栖壺缺何須歌老驥
冠高不復帶雄雞黃公遁跡終辭漢范蠡逃名徑入齊
回首平生事堪笑少年豪氣北山低

草鞋不踏禁街泥一把黃茅足穩栖賦性可憐如野鹿
驚心未免聽朝雞是非畢竟何時定出處從來自不齊
坐斷寒更吟未了爐灰雪積火潛低

再用前韻

勞生擾擾燕分泥常逐東風到處栖止渴望漿那及酒
供炊無米敢言雞仙人墮淚空辭漢處士為書已贊齊
陋巷自無車馬到衡門從此不嫌低

再用渠字韻二首

兒女憐翁競挽鬚侯門何事曳長裾功名於我非所願
風月與人良不踈絳灌自能扶漢業綺黃只合老商餘
耳根一洗塵囂淨灑灑寒泉玉漱渠

倚門吟嘯撫冰鬚吟罷山堂月滿裾活計蕭條秋水冷
鬢毛衰颯暮林疎難將朽質供時用幸有藜羹給歲餘
自笑妄生分別想清溝未必勝河渠

和答丹山夢庵張丈二首

抖擻征衣衣上塵歸來白髮一番新剩將酒向愁邊酌

金方四月
卷四
却恐人嫌醉裏真
世事飽諳惟欲睡
詩情謾苦只能貧
歲寒松柏東風外
付與千林自在春

幸自無人識姓名
忍將兩脚鬧中行
原從有我安排了
強欲趨時作麼生
案上一編聊慰眼
世間萬事不關情
此心唯有沙鷗信
來往江頭自不驚

中秋之夕封生仲堅衛生行之携酒與詩見過各
依韻以答二首

萬籟聲沉暮靄收
長河瀉浪洗清秋
遙天千里淡如水

明月一輪光滿樓
隨意傾銀成勝賞
誰家橫玉調新愁
可憐白首蟾宮客
羞對嫦娥說舊遊

夜涼河漢靜無聲
澄澈天開萬里晴
蟾吐寒光呈皎潔
桂排疎影甚分明
良宵方喜故人共
醉語乃知隣舍驚
一片詩魂招不得
九霄直與月俱清

翼日二子見和復韻以答四首

短髮蕭蕭散不收
老來何意更悲秋
常年有酒或無月
今夕乘晴好上樓
懶對嬋娟談往事
祇將笑語替清愁

冷光願照金尊裏記得開元太白遊

忽聽城樓暮角聲飛空片月快新晴雲烟歛跡無纖滓
星斗收光不敢明千里共看人已老一枝難穩鵲頻驚
醉吟坐到三更盡病骨不禁秋氣清

香霧霏霏晚漸收冰輪碾破一天秋便邀東海騎鯨客
同上西家拍酒樓不向此時撩一醉更於何處散千愁
年年八月如今夕永結無情汗漫遊

好將弦管試新聲月正圓時天正晴光射酒杯浮潋灩

香飄桂實甚虛明拂衣醉舞人爭看抵掌狂歌鳥暗驚
邂逅尊前成一笑勿論誰濁與誰清

丁未立春日與彥衡景純史生飲坐中彥衡有詩
且需余和為賦此

花枝摘索費詩催自笑吟懷老未灰白髮漸如殘雪滿
朱顏不逐早春回可人襟韻來三客入眼風流欠二梅
有酒問身強健在莫教閑却手中杯

翌日再用前韻簡二三子

長吟未了雨來催雪積寒爐火漸灰一點枝頭紅尚淺
半痕溪面綠初回行擔酒債還思杜坐得詩窮反笑梅
報答風光無好語對時虛覺費清杯

獨坐有懷往昔復次前韻二首

短髮刁騷不受催坐看浮世幾飛灰流年冉冉人空老
世事悠悠首重回天遠望窮歸去雁地寒瘦損折殘梅
等閑無計驅愁得除向壚頭酒一杯

快飲休嗔急管催昔人不飲已成灰轉頭晚景無多子

屈指春風又幾回
揆悶直須煩麴蘖
和羹宜且買鹽梅
莫言兩手渾無用
花下猶堪把酒杯

衛生行之少負俠氣與余兄弟相遇於艱難之際
自抑惴惴常若不及迨今十五年矣家貧而益
安豈果有所學乎不然何其舍彼而取此也生
正月十六日誕彌日也因賦詩以贈為一笑樂
且以堅其志云

低心不肯逐時趨
坐覺瓶儲歲屢無
試手耕絀新事業

傳家弓冶舊規模膝前癡騷憐文度酒後粗狂憶阿奴
生弟襲之嗜酒而狂生每容之但願年年身健在一尊長得與君俱

再用杯字韻二首

綠髮潛為白髮催賞心半逐壯心灰已擽事業因循却
又放風光寂寞回春意等閑遺病木曉寒特地妬芳梅
病來止酒人應笑忍對良辰負此杯

人間聲利任渠催烈焰何嘗發死灰世態翻雲悲易變
年華如水挽難回驚心舊曲空聞笛點額新粧不見梅

百轉枯腸思一溉虛名方信不如杯

送山人李生湛然之燕

驚心浩浩塞雲寒珍重儒冠莫浪彈相府豈能容阮籍
館人那解識馮驩無書可上裘空敝有夢難通刺欲漫
且好駐君千里駕小齋如斗足容安

戊申四月書於史氏仲恭別墅

飄飄天地一癯儒問柳尋花未要扶老去生涯三徑在
向來意氣一分無尊前乍喜紅潮頰鏡裏那知雪滿鬚

睡起北窓成獨笑人間岐路足崎嶇

午芹道中

渺渺江風吹葛衣
愛閑長與世相違
青絲步障柳千樹
碧玉屏風山四圍
入眼江花如慰意
近人沙鳥信忘機
虛名到此成何事
一笑平生始覺非

漫書二首

山翁只合坐山房
四壁蕭然一木床
心為感時空渺渺
髮因懷舊變蒼蒼
人間日月驚何速
物外光陰本不忙

一枕北窓眠正穩却疑身世在羲皇

擾擾膠膠人自忙心閑無地不清涼
雨邊戰陣蚍蜉鬧花底生涯蝴蝶狂
幸有文書遮老眼豈無藜藿療飢腸
從教門外蓬蒿滿不見白丁計亦良

五月卅日書以自適二首

隴月娟娟白板扉溪風颯颯冷麻衣
藜床坐月人空老鐵斨磨穿計已非
叔夜自難堪作吏季鷹那解早知機
但教方寸長無事一酌清泉亦自肥

身貨休論兩孰多留連光景且婆婆穀藏得失不相遠
蠻觸功名能幾何悶復往尋醅甕飲醉來慵擊唾壺歌
扁舟舊有江湖趣肯著藍衫換一蓑

次韻周景純先生見寄之什

閒尋閒計適閒情日月催人慨易傾築室未能依表聖
卜鄰先喜得君平慚非世用甘藏拙謬得時稱豈是誠
我與西山相信久不須更與白鷗盟

元日夜與二三子小酌

一尊相對意如何却恨歸來白髮多萬事到今從鹵莽
一年好處莫蹉跎閑收暮景供清酌醉挽春風入浩歌
多謝東君不嫌客也教衰朽得陽和

幽懷用夢庵張丈韻四首

此懷耿耿付東流蒲柳形骸不耐秋老去始知身是幻
病來漸覺髮絲稠青蠅點物驅還至白鳥猜人挽不留
收得閑愁供晚睡西風吹夢冷悠悠

自嘆行藏久謬悠多君雅志在林丘一生斷向閑中了

百計何勞分外求
搃把行年償酒債
更將餘力費詩籌
膠膠擾擾人間世
一笑尊前萬事休

百年過眼半羈旅
一日逢人九嘆嗟
叔夜不堪長抱病
馮驩何苦久無家
飄零身世風頭絮
淡薄人情春後花
擬把餘生釣江海
為煩嚴子借魚槎

起來乘霽看年華
便著芒鞋代鹿車
白水明邊鎔落日
碧天盡處散餘霞
決明點檢無多實
甘菊商量有數花
滿酌一杯都不計
人間萬事足安蛇

封仲堅挽詞三首

幾年為我駐行輶
一閉幽宮挽不留
望望故丘君飲恨
泔泔遺息衆為憂
皇天無路申三問
隙地何人借一坯
重對平時舊遊處
野烟荒草祇增愁

藏身無地古難堪
賻葬何人為脫驂
樊子未來誰主後
縈猶在勝生男
十年往事如春夢
千古遺經憶夜談
一片羈魂招不得
暮天黯黯冷雲曇

昔嘗屈指計前期
今守窮廬竟死為
多病每慚調護力

餘生誰救急難時
匠斤欲運莊周泣
鄰笛遙聞向秀悲
一片嵌巖磨不磷
更堪重讀孟郊詩

薛寶臣生朝

曉砌初開十二萼
一尊介壽為君傾
昔聞存義能從政
今見元欽又繼兄
謝傳階前瓊樹秀
老萊堂下綵衣輕
莫言小邑徒勞耳
萬里青雲第一程

送張器之北上

匹馬翩翩出漢闕
春來塞草幾芊綿
人憐季子貂裘敝

自誓桑生鐵硯穿羊角會搏溟海上鴻毛行遇順風前
吾軍正賴君增氣萬里青雲穩著鞭

眯眼風沙去路迷又携書劍過山西片心耿耿摧尤壯
六翮翩翩養復齊千里會看黃鵠舉一枝休嘆綵鷺栖
丈夫自有乘車日司馬橋名不浪題

蘭氏晚節軒二首

幾年會計屈微官五斗才堪給酒錢野鶴風標寒愈峭
巖松節目老方堅石腸未省隨時轉鐵面何常與世妍

回首風烟三徑晚典刑當作畫圖傳

都把升沉不置懷一尊時對好山開張公雅有江湖志
崔子本非丞貳才為政從渠嗤拙宦買田已自賦歸來
高情想像常如在不逐春風沒草萊

贈醫者

術以醫名行以儒為人不肯著方書共高世外封君達
自許山中陶隱居轉首恥為他日計論心愧未古人如
有兒還解傳家否試問門前長者車

壽尊兄遜庵先生

筆頭風雨幹千鈞
早歲嘗充觀國賓
避事就閑真得計
有才無用且藏身
虛名到底將安濟
涉世而今不厭貧
白髮相看老兄弟
暮年同作太平人

送王載之

鞍馬丁年事遠遊
北州未穩復南州
胸懷落落馮驩餓
塵土翩翩季子裘
擊筑悲歌增感慨
倒瓶濁酒浣離憂
一編笑我衡茅底
坐送光陰到白頭

自壽

霏霏晴雪點吟鬚
颯颯秋風戀客裾
拙計每為妻子笑
病多還覺友朋疎
行年如此事無幾
破屋脩然家有餘
濁酒一杯吾自樂
人間富貴不關渠

雨後漫成二首

羈思紛紛不易裁
晚涼扶病獨登臺
翩翩幽鳥避人去
殷殷雷聲送雨來
已擯此身閑裏老
且將笑口酒邊開
安車待聘非吾事
休作姑山隱逸猜

詩情牢落不堪裁
人物風流愧玉臺
門外寂無肥馬到
枕邊剩有好山來
年華滾滾身如幻
世事膠膠眼倦開
擬把餘生寄江海
沙頭鷗鷺莫驚猜

再和二首

涼月娟娟玉半裁
曉風吹夢下瑤臺
笛簫鄰杵相和切
秋共羈愁一併來
到處溪山容我懶
違時顏面向誰開
少陵可笑行藏拙
獨倚危樓剛自猜

癭杓天然不用裁
日傾新醞剝蓮臺
幾回醒酒風纔過

一霎催詩雨又來兩脚只堪閑處著寸心贏得片時開
此身有類傷弓鳥曲木無情亦暗猜

三和二首

壯志如今日抑裁功名不復夢雲臺平生回首事安在
一葉驚心秋又來不引壺觴聊自勸未知懷抱若為開
浮名畢竟成相誤盍作閑居鴟毒猜

世事紛紛乃剗裁何如無事醉春臺脅肩一笑亦良苦
有田幾時歸去來百念都隨灰燼冷一尊聊為聖賢開

從今便入農桑社園友溪翁莫見猜

四和二首

嘗把閑身靜品裁殘生何幸脫興臺田園依舊喜重到
松菊就荒傷獨來懶散從教塵事廢襟懷難對俗人開
自量不肖非逋客為報山靈且莫猜

林外炊烟細若裁詩情引上賦春臺螢從楊柳梢頭墮
雨向梧桐葉上來華髮蕭蕭秋更老衡門寂寂晝慵開
終南佳處吾將老仕宦休為捷徑猜

五和二首

世事浮雲不受裁
羊裘重覓子陵臺
隨人明月娟娟靜
吹面涼風特特來
多技漫勞寧似拙
兩眉深鎖不如開
床頭忘却糟床酒
誤作蕭蕭夜雨猜

素位無心入聖裁
姓名不到郭公臺
閒拈藜杖看雲度
靜掃松軒待月來
未把酒杯頭懶舉
試拈書冊手慵開
荒才自信非鄒樂
安處青山有底猜

張七賢圖

七賢不與竹林期人物風流各一時妙語霏霏皆作者
高情落落更何之山川如畫靈猶在溟渤飛塵世屢移
欲薦菲辭無處問黃流千里夕陽遲

贈琴士任先生

翛然天地一癯仙誤落紅塵二十年萬事成虧雲過眼
一身蹭蹬雪盈顛科頭欲寫卷中趣洗耳試聽徽外絃
他日遂君林下約月明風露淨娟娟

藥郎中萱草堂

共道傳家以義方長留春色在萱堂靜宜有壽何須祝
樂自無憂不待忘華萼光輝連二妙瓊林照映列諸郎
要看靴笏床俱滿歲月靈椿未易量

容安軒

走遍人間行路難歸來始覺此心安半椽自覆人應笑
兩膝足容吾已寬階下蘭生猶可佩籬邊菊老儘供餐
微軀此外無多事一炷清香篆曲盤

總管隴西公歸自趙城以雪途行役見命賦此以

獻

曉鞍催發五更鐘
王事匆匆不易從
雪氣空濛迷馬首
霜威跋扈襲裘茸
誰家村落雞頻唱
到處園林鳥絕踪
却憶雲山舊栖地
擁衾高卧養吾慵

萬夫長李侯西觀回作詩為賀

帷幄雍容擁萬夫
雄襟英概漢臧吳
獠兒坐失重巖阻
戰士爭先九折驅
去日旌旗填蜀道
歸時笳鼓競堯都
謬為門下登龍客
擬頌勤勞愧腐儒

坐擁貔貅十萬夫
雍容帷幄看投壺
威風栗烈前無敵
膽氣輪囷大滿軀
銅柱直期標百粵
連城潛覺失全吳
江南公事行將畢
願獻扁舟范蠡圖

二妙集卷四